

Siunnersuummut nassuiaatit

Nassuiaatit nalinginnaasut

1. Aallaqqaasiut

1.1. Siunnersuummut pingaarnertut tunuliaqutaasut

Naalakkersuisut kiisalu Biskoppip palasinik, provstinik kiisalu domprovstinik atorfinitsitsisarnermi aamma soraarsitsisarnermi piginnaatitsissut Naalakkersuisuniit biskoppimut nuunneqarnissaa kissaatigisimavaat.

Atorfinitsitsisarnermik soraarsitsitsisarnermillu piginnaatitsissutip allanngortinneqarnerata malitsigisaanik atorfinitsitsineq soraarsitsinerlu pillugit aalajangiinissamut piginnaatitsissut allaffissornikkullu suliasat naalakkersuisoqarfimmit akisussaasumit biskoppimut nuunneqarput.

Palaseqarfiup atuagarsuinut palasip allaffissornikkut aqutsinerata ilaa palaseqarfimmi sulisunut allanut tunniuttariaqalersinnaanerani pisariaqartitsisoqartoq aamma paasineqarsimavoq.

Palaseqarfiup atuagarsuaanut palasip allattuisarnerata allamut suliakkiutiginera palasip suliassanik allanik suliaqarnissaanik kinguneqassaaq. Allaffissornermik suliallit suliamik isumaginnilertussanik piginnaanngorsarnissaannik pisariaqartitsisoqassaaq, tassa imaappoq palaseqarfiup atuagarsuaanut allattuinnermut pikkorissartinneqartariaqassapput. Biskoppip taamaammat aamma oqaluffimmi sulisunik ilinniartitseqqinnissaq ingerlaqqiffiusumillu ilinniartitseqqinnissaq pisariaqartissinnaavaa, assersuutigalugu palasimut ikiortit palaseqarfiup atuagarsuaanut allattuinnermik ilinniartinneqarnissaat.

2. Siunnersuummi immikkoortut pingaarnerit

2.1 Inatsisit atuuttut

Inatsisit atuuttut tassaapput, Ilageeqarneq pillugu Inatsisartut inatsisaat nr. 9, 19. maj 2010-meersoq, Ilageeqarneq pillugu Inatsisartut inatsisaatigut nr. 2, 29. november 2013-meersutigut allanneqartoq (Ilageeqarnermi atorfinitsitsisarneq, uppersarsaatit akiliuteqartarneq palasit ajoqillu upperisarsiorderup tungaatigut pissuteqartumik ilagiinni suliassanik suliaqarnissanut pisussaajunnaarsitaasarnerat, aalajangiinnermik allaffissornermi ingerlatsisunut qulliunerusunut suliassanngortitseqqittarnernik killiliineq kiisalu allaffissornermi pinngitsoorani malittarisassiortarnissaq pillugu aalajangersakkat) aamma Ilageeqarneq pillugu Inatsisartut inatsisaannik allanngortitsineq pillugu Inatsisartut inatsisaat nr. 27, 3. december 2018-meersoq (Ajoqinik aamma pattattunik ilinniartitaanernik aaqquissuussinerit aamma nipangiusimasassanik ilisimatitseqatigiffiusumik oqaaseqaatissanullu tunngasunik ataatsimiittarnerit il. il.).

Nalunaarutit eqqarsaatigalugit nalunaarutit tulluuttut siunnersuummut attuumassutillit aalajangersagaapput:

Palasinik atorfinitsitsinernut il.il. ilagiit sinniisaasa peqataatinneqartarnerat pillugu Namminersorlulik Oqartussat nalunaarutaat nr. 38 18. januar 1998-imeersoq

Ittoqqortoormiini palasit atorfup inuttalernissanut periusissaq pillugu Namminersorlulik Oqartussat nalunaarutaat nr. 15, 12. oktober 2017-imeersoq

Atuagarsuarni allattuisarneq aamma atinik allannguinermi uppersaattillu ilaasa tunniunnerini akiliuteqartarnek pillugit Namminersorlulik Oqartussat nalunaarutaat nr. 17, 14. september 2015-imeersoq

Palaseqarfiit agguataarneri pillugit Namminersorlulik Oqartussat nalunaarutaat nr. 2, 28. januar 2011-meersoq

Naalakkersuisut Biskoppillu akornanni akisussaaffiit suliassallu agguarsimanerat
Naalakkersuisut Ilageeqarnermi pingaarnertut akisussaasuusut, taakkulu pillugit aalajangersagassanik Biskoppi isumaqatiginiariarlugu aalajangersagaliorsinnaanerit Ilageeqarneq pillugu Inatsisartut Inatsisaanni § 3, imm. 1-imi aalajangersagaavoq.

Ilageeqarneq pillugu Inatsisartut Inatsisaata § 6, imm. 1-iani aalajangersagaavoq, Kalaallit Nunaata Biskoppeqarfiani Biskoppip Ilageeqarnermi qitiusumik aqutsineq allaffissornerullu siulersornera isumagisarissagai biskoppeqarfimmilu provstinik, palasinik ajoqinik ilagiinnullu sinniisaasunik nakkutilliisuussasoq.

Naalakkersuisut biskoppillu akornanni suliassat akisussaaffiillu agguarneqarnerat pillugu Ilageeqarneq pillugu inatsisitigut aalajangersagaqarnermi, anguniagaavoq Naalakkersuisut Biskoppillu akornani erseqqissumik paasiuminartumillu suliassat agguataarsimanissaat. Ilagiinni tassanilu atorfilinni soqutigisalinnilu aalajangiisinnaatitaaneq sunniuteqarsinnaanerlu Biskoppimut tunniunneqassasut aamma anguniagaasimavoq.

Naalakkersuisut taamaalillutik Ilagiinnut tunngasunik inatsisiliornermik nassuiarnissaannillu suliassaqrput, aningaasanut inatsimmut naleqqiullugu pingaarnertigut missingersuutinik aqutsisuullutik aamma suliassaqarfimmi nalinginnaasumik periusissiamik malittarisassanillu ilusilersuisarlutik. Tamatuma peqatigisaanik Biskoppip allaffitsigut suliassat arlallit tigussavai, tamatumani ilanngullugu palasit ilinniarteqqinneqartarnerat.

Ilageeqarneq pillugu inatsisip § 6, imm. 1-ani allassimavoq, Kalaallit Nunaata biskoppeqarfiani Biskoppip Ilageeqarnermi qitiusumik aqutsineq allaffissornerullu siulersornera isumagisarai biskoppeqarfimmilu provstinik, palasinik ajoqinik ilagiinnullu sinniisaasunik nakkutilliisuulluni. Biskoppi taamaalilluni pisortat ingerlatsiviini oqartussanut

kaajallaasitaliorsinnaalerlunilu ilitersuusiorsinnaalissaaq kiisalu sulianut kaajallaasitat ilitersuutillu naapertornagit ingerlanneqartunut uparuaasinnaalissalluni.

Biskoppip aalajangigai ilageeqarneq pillugu inatsimmi 28, imm. 3 naapertorlugu Naalakkersuisunut naammagittaalliutigineqarsinnaapput (nalinginnaasumik naalakkersuisoqarfimmut ilageeqarneq pillugu akisussaasumut). Aalangiinerit upperisarsiornermuinnaq tunngassuteqartut taamaallaat misilinneqassapput inatsisitigut tunngavinnut attuumassuteqarpata.

Atorfinitsitsinnaaneq soraarsitsisinnaanerlu

Ilageeqarneq pillugu Inatsisartut Inatsisaanni atuuttumi palasinik, provstinik kiisalu domprovstinik atorfinitsitsinnaaneq soraarsitsisinnaanerlu Naalakkersuisut akisussaaffigigaat aalajangersagaavoq. Tamanna § 26g-mi palasit eqqarsaatigalugit aalajangersarneqarpoq, imatut allassimasunik:

”§ 26 g. Palasit atorfimmi kina atorfinitsinneqassanersoq Naalakkersuisut aalajangissavaat, tak. §§ 26e aamma 26f. Qinnuteqartoq biskoppip inassuteqaataanut ilanngunneqanngitsoq atorfinitsinneqarsinnaanngilaq biskoppi oqaaseqaateqarsimatinnagu.”

Provstinik domprovstinillu atorfinitsitsineq eqqarsaatigalugu § 26l, imm. 1-imi aalajangersarneqarpoq:

”§ 26 l. Naalakkersuisut aalajangissavaat provstitut imaluunniit domprovstitut atorfimmut kina atorfinitsinneqassanersoq. Qinnuteqartoq biskoppip inassuteqaataanut ilanngunneqanngitsoq atorfinitsinneqarsinnaanngilaq biskoppi oqaaseqaateqarsimatinnagu.”

Naalakkersuisut aalangiisinnaatitaaneq pillugu Biskoppip Allaffianut allakkatigut 2015-imeersutigut, tamatumalu kingorna aalangiisinnaatitaaneq pillugu allakkamut ilassatigut, piginnaatitsissut biskoppeqarfimmut tunniuppaat. Tassunga atatillugu uku aalangiunneqarput.

Palasinik atorfinitsitsinermi Biskoppimit uku isumagineqassasut:

- Atorfimmik inuttassarsiuussinissaq
- Atorfik inuttassarsiuunneqartoq pillugu allagarsiussamik nassiussinissaq kingornalu Aningaasaqarnermut Sulisoqarnermullu Aqutsisoqarfimmi akuerisassanngortinneqarnissaa, tassunga ilanngullugu atorfinitsitsinerni isumaqatigiissusiornissaq
- Qinnuteqaatinik kiisalu taakkununga tunngasunik uppersaatiniq tigooqqaaneq
- Ilagiit sinniisaannut attaveqarneq
- Atorfinitsitsinermi inatsisitigut suliassat pillugit Aningaasaqarnermut Sulisoqarnermullu Aqutsisoqarfimmut attaveqarnissaq
- Sulisunut inissiat pillugit inissiaatileqatigiiffimmut attaveqarnissaq

- Meeqqanik pinerliisimannginnermut uppersaammik piniarnissaq

Naalakkersuisoqarfimmit tulluuttut malinneqarsimanissaat qulakkeerneqassapput:

- Atorfik inuttassarsiuunneqartoq pillugu allagarsiussassap Aningaasaqarnermut Sulisoqarnermullu Aqutsisoqarfimmit akuerineqarsimanissaa
- Qinnuteqaatit ilanngussartallit
- Ilagiit sinniisaasa oqaaseqaataat
- Ilagiit sinniisaannik ataatsimeeqateqarnermi aalajangiiffigisanik allattuiffiit
- Biskoppip inassuteqaataa
- Ulloq Biskoppip ilagiit sinniisaannik ataatsimeeqateqarnissaa pillugu ilisimatitsisarnissaq
- Qinnuteqartut sulisinnaanngornissamut uppersaammik tunineqarsimanersut imaluunniit tunineqarsimannginnermut pillugit ilisimatitsisarnissaq

Tamatuma kingorna Naalakkersuisup aalajangissavaa kina palasit atorfinitinneqassanersoq.

Naalakkersuisoqarfiup aalajangeereeruni itigartitaasut allakkatigut nalunaarfigissavai, atorfinitinneqarnissamik neqeroorfigineqartoq ilanngullugu.

Biskoppi tamanna pillugu ilisimatitsissaaq aamma Biskoppip najoqqutassat suliasallu qinnuteqartup sulilernissanut pisariaqartut isumagissavai.

Atorfinititsinermit suliasanik atorfinititsinermit soraarsitsinermullu tunngassuteqanngitsunik isumaginninnissamut piginnaatitaaneq eqqarsaatigalugu inatsimmi § 6, imm. 1-imi allassimavoq, Biskoppi provstinik, palasinik, ajoqinik ilagiinnullu sinniisunik nakkutilliissasoq.

Nakkutilliinermut ilaatigut ilaatinneqarput ilagiit nassuerutiginninnermi tunngaviannik, naalagiaritsisarnermut aaqqissuussamik naalagiaritsisarnilu ileqquusunik ataqqinninnermik Biskoppip nakkutilliisarnissaa. Biskoppi aamma palasit palasit sulinerannik nakkutilliisarpog, nakkutilliinermilu Biskoppi atorfimmut atatillugu unioqqutitsinermit uparuaasinnaavoq pineqaatissiisinnaallunilu, soraarsitsisinnaananili.

Palasinik, provstinik domprovstinillu atorfinititsineq pissaaq, palasit pineqartillugit §§ 26 e–26 i-ni allaaserineqartutut periuseq aalajangersimasooq malillugu, provstit aamma domprovstit pineqartillugit §§ 26 j-26 l-ni allaaserineqartut malillugit.

Palasinik atorfinititsinermit periuseq malillugu biskoppip imaluunniit provstip biskoppip piginnaatitaata ilagiit sinniisaanni ilaasortatut qinikkat akornanni qinnuteqarsimasunik ilisimatitsiffiusumik ataatsimeeqatigissavai. Tamatuma kingorna ilagiit sinniisaattut qinigaasimasut atorfinititsineq pillugu oqaaseqaateqassapput. Oqaaseqaat taasiffissatut

pingaarnersiorlugu tunniunneqassaaq, ilagiillu sinniisaat ajornanngippat peqataasut 3-t piukkunneqarlutik taaneqarnerpaasimasut pillugit nalunaaruteqassallutik.

Biskoppi sapinngisamik qinnuteqartunik pingasunik pingaarnersiorlugit tulleriiaarneqartunik inassuteqassaaq. Biskoppip qinnuteqaatit ilagiit sinniisaasa oqaaseqaataannik ilallugit kiisalu nammineq inassuteqaanni ilanngullugu Naalakkersuisunut nassiutissavai (nalinginnaasumik naalakkersuisoqarfimmut ilageeqarneq pillugu akisussaasumut).

Qinnuteqartoq biskoppip inassuteqaataanut ilaanngitsoq Naalakkersut atorfinitsikkusuppassuk, atorfinitsitsisoqartinnagu biskoppi oqaaseqarnissamut periarfissinneqassaaq.

Qinnuteqartoq ilagiit sinniisaasa oqaaseqaataannut ilanngunneqarsimanngitsoq Naalakkersuisut atorfinitsissinnaanngilaat. Qinnuteqartoq ilisimatitsiffiusumik ataatsimiinnermi siullermik taasisoqarnerani tamanit qinerneqartoq peqataanillu biskoppip inassuteqaataani ersertoq atorfimmi atorfinitsinneqassaaq. Immikkut ittumik pissutissaqartoqarpat nutaamik inuttassarsiuisoqarnissaa nutaamillu inassuteqartoqarnissaa Naalakkersuisut aalajangersinnaavaat.

Suliffeqarfinnut inunnulluunniit ilagiit sinniisaannik pilersitsiffiusimanngitsunut sullissinissaq siunertaralugu palasitut atorfiit tamakkiisumik ilaannakuusumilluunniit pilersinneqartut inuttalernissaanni Naalakkersuisut § 26 i naapertorlugu periusissanut malittarisassanik aalajangersaasinnaapput. Tamanna aamma atuuppoq ukioq ataaseq angullugu sivikinnerusumik atorfinitsitsisoqassatillugu. Aalajangersakkamik tassannga Naalakkersuisut tunngaveqarlutik, Ittoqqortoormiini palasitut atorfiup inuttalernissanut periusissaq pillugu Namminersorlutik Oqartussat nalunaarutaat nr. 15, 12. oktober 2017-imeersoq atuutsilerpaat. Maani aalajangersakkami malittarisassat Ittoqqortoormiini Palaseqarfimmi piffissami ilagiit sinniisaannik pilersitsiffiusimanngitsumi palasitut atorfimmit inuttalersuinissamut atuupput.

Aamma Palasinik atorfinitsitsinernut il.il. ilagiit sinniisaasa peqataatinneqartarnerat pillugu Namminersornerullutik Oqartussat nalunaarutaanni nr. 38, 18. januar 1999-imeersumi suliffeqarfinnut inunnulluunniit ilagiit sinniisaannik pilersitsiffiusimanngitsunut sullissinissaq siunertaralugu palasitut atorfiit tamakkiisumik ilaannakuusumilluunniit pilersinneqartut inuttalerneqarnissaat pillugu aalajangersagaqarpoq, Danmarkimi Palaseqarfik ilanngullugu.

Suunngitsunnguamik allannguilaarnikkut provstinik domprovstinillu atorfinitsitsisarnermi periusissatut malittarisassanik aamma aalajangersaasoqarpoq.

Ilageeqarnermi allanik atorfinitsitsinermi § 26 m, imm. 2-mi aalajangersagaavoq, Biskoppip, palasimik atuagarsuarnik allattuisumik ilagiillu sinniisaannik tusarniaareernerup kingorna, ajoqinik organistinillu atorfinitsitsinissamut soraarsitsinissamullu provstit piginnaatissinnaagai. § 26 m, imm. 3-mi aalajangersagaavoq, Biskoppip, palasimik

atuagarsuarnik allattuisumik ilagiillu sinniisaannik tusarniaareernerup kingorna, oqaluffinni ikiortit, soorlu pedelit, eqqiaasut il.il., atorfinitsitsinissamut soraarsitsinissamullu provstit piginnaatissinnaagai. § 26 m, imm. 4-mi aalajangersarneqarsimalluni, provsteqarfinni palaseqarfinnilu allaffinni allaffissornikkut sulisunik atorfinitsitsinissamut soraarsitsinissamullu provstit biskoppip piginnaatissinnaagai. Piginnaatitsissutitut aalajangersakkanut taakkununga biskoppip sulisunik taakkuninnga atorfinitsitsinnaanermut soraarsitsinnaanermullu piginnaatinneqarnera, § 6-itigut tunniunneqartoq tunngaviuvoq.

Palaseqarfimmi atuagarsuarnut allattuisarneq

Ilageeqarneq pillugu Inatsisartut inatsisaata § 15-iani palaseqarfimmi atuagarsuarmut allattuisarnissaq pillugu malittarisassat aalajangersagaapput, tassani allassimalluni:

" § 15. Palaseqarfimmi arlalinnik palaseqarsimappat palasit kiffartortut ilaat ataaseq taakku akornannit palaseqarfimmi atuagarsuarnik allattuisutut Biskoppip toqqassavaa, ukiut sisamat tikillugit atasussatut.

Imm. 2. Palaseqarfimmi palasi ataasiinnaatillugu, taassuma atuagarsuarnut allattuineq isumagissavaa.

Imm. 3. Palasip atuagarsuarnik allattuisup akisussaaffigaa palaseqarfimmi allaffissorneq pingaartumillu atuagarsuit allattuiffigineqarnissaat, ilagiinni suliassat aqqissuunneqarnerat, matumanittaaq naalagiarnertit palasit akornanni agguataarnissaat, piareersimasut piffissalersornerisa aalajangersarneqarnerat aamma aningaasanik aqutsineq.

Imm. 4. Atuagarsuarnik allattuisarneq pillugu Naalakkersuisut Biskopimut isumaqatigiinniareernikkut aalajangersakkanik aalajangersaasinnaapput."

§ 15, imm. 1-imut pingaartumillu § 15, imm. 2-mut oqaasertaliussatigut paasineqarsinnaavoq, palasi palaseqarfiup atuagarsuaanut allattuisussa allattuinnissamut akisussaaginnanngitsoq, aammali suliassamik nammineerluni isumaginnittussaasoq. Tamatuma malitsigisaanik suliassap allamut tunniunneqarsinnaaneranut inatsisitigut erseqqissumik tunngavissaqartoqanngilaq.

Oqaluffinni atuagarsuit inuunermi qitiusutut pisut, soorlu inunngortoqarnera, kuisitsisoqarnera, atsiisoqarnera, apersortittoqarnera, katittoqarnera toqusoqarneralu pillugu oqaluttuarisaanermi nalunaarsuiffittut atuutiinnanngillat. Kinguaariinnik misissuinissamut tunngavittut aalajangiisuulluinnarput, paasissutissanik ilaqutariit ataqatigiinnerannik takutitsisinnaasunik aamma kinguaariinni inuit ataasiakkaat pillugit paasissutissanik imaqartaramik. Kiisalu oqaluffinni atuagarsuit inatsisitigut pingaaruteqarput, pisortatigoortumik uppersaataagamik. Taamaammatt oqaluffiit atuagarsuannut eqqortumik allattoqartarnissaa pingaaruteqarluinnarpoq.

Oqaluffinni atuagarsuarnut allattuisarneq nalunaarutip §§ 21-ani aamma 22-ani erseqqinnerusumik aalajangersagaavoq. Atuagarsuarni allattuisarneq aamma atinik allannguinnermi uppersaatillu ilaasa tunniunnerini akiliuteqartarneq pillugit

Namminersorlutik Oqartussat nalunaarutaat nr. 17, 14. september 2015-imeersoq.
Aalajangersakkat ima allassimapput:

” § 21. Ilagiit allattaavissuat palasimit ilagiit allattaavissuannik aqutsisumit nammineerluni aqunneqassaaq, taamaattoq tak. imm. 5.

Imm. 2. Paasissutissanik isumannaallisaavik palasimit sulisumit allamit, ajoqitut ilinniagalimmit imaluunniit inummit ilagiit allattaavissuannik ingerlatsinissamut pikkorissarsimasutut biskoppimit akuerisaasumit aqunneqassaaq, taamaattoq tak. imm. 3-5.

Imm. 3. Paasissutissanik isumannaallisaavik ajoqimit pikkorissarsimanani atuaasartumit biskoppip piginnaatitsinera malillugu ingerlanneqarsinnaavoq.

Imm. 4. § 26, imm. 1 naapertorlugu paasissutissanik isumannaallisaavik Nunatta Katersugaasivianut Allagaateqarfianullu tunniunneqarpat, pingaarnertut allattaavimmut ilanngussat pillugit nalunaarut malillugu paasissutissanik isumannaallisaavimmut ilanngussisoqassaaq.

Imm. 5. Biskoppi immikkut illuinnartunik pisoqartillugu allat, tigussaasumik nalinginnaasumilluunniit ilagiit allattaavissuannik ingerlatsinissaannut akuersisinnaavoq.

Imm. 6. Kialluunniit pisoq ataaseq pingaarnertut allattaavimmut paasissutissanillu isumannaallisaavimmut allattorsinnaanngilaa.”

§ 21, imm. 1-imi takuneqarsinnaasutut palaseqarfiup atuagarsua palasimit palaseqarfiup atugarsuarnik nammineerluni allattuisartumit isumagineqartarpoq. Tassani imm. 5-imi aalajangersagaavoq, Biskoppip immikkut illuinnartunik pisoqartillugu allat, tigussaasumik nalinginnaasumilluunniit ilagiit atuagarsuannik ingerlatsinissaannut akuersisinnaanera.

Nalunaarutip § 22, imm. 1-iani kina palaseqarfiup atuagarsuanut aamma pingaarnertut allattaavimmut paasissutissanillu isumannaallisaavimmut akisussaasuunersoq aalajangersagaavoq:

” § 22. Palasi ilagiit allattaavissuannik aqutsisuusoq palaseqarfimmi ilagiit allattaavissuannut akisussaasuvoq, tassunga ilanngullugu ilagiit allattaavissuannut tunngatillugu maleruaqqusassatut aalajangersakkat naapertorlugit peqqissaartumik ingerlanneqarnissaanut akisussaaneq.

Imm. 2. Ukiut tamaasa septemberip qaammataani palasi allattaavimmi pingaarnerni paasissutissanik pingaarnerni suliaqartup oqaloqatigiissutigisarpaa.

Imm. 3. Ukiut tamaasa kingusinnerpaamik ulloq 30. september palasip ilagiit allattaavissuannik aqutsisup provstimut nalunaarutigisarpaa oqaloqatigiinneq pisimasooq aamma iluarsissuteqarnissamut qanoq annertutigisumik tunngavissiiinersooq.

§ 22, imm. 1-imi takuneqarsinnaasutut, oqaluffiup atuagarsuarnik isumaginnittup oqaluffiup atuagarsuanut allattuisoqarsimanissaa aamma akisussaaffigivaa, aamma § 21, imm. 5 naapertorlugu suliaasaq allamut tunniunneqarsimagaluarpuunniit.”

Palasi oqaluffiup atuagarsuanut allattuisarteq tunngaviatigut isumaginninnisamut palaseqarfimmi atuagarsuarmut tunngatillugu akisussaasuvoq, tak. § 22. Palaseqarfiit illoqarfinnut tamanut agguataarsimasuupput, tak. Palaseqarfiit agguataarneri pillugit Namminersorlutik Oqartussat nalunaarutaanni nr. 2, 28. januar 2011-meersumi § 1. Immikkut ittumik pisoqartillugu, tassa sumiiffiit kommunit agguataarneqarnerisa avataanniittut pineqartillugit domprovsti provstiluunniit, imaluunniit palasi palasilluunniit domprovstimit toqqarneqartut suliassamik isumaginnissapput.

” § 1. Illoqarfiit ataasiakkaarlutik nunaqarfii ilanngullugit tassaapput palaseqarfiit, taamaattorli tak. imm. 2.

Imm. 2. Ivittuut aamma Paamiut illoqarfii Paamiut palaseqarfianiipput.

§ 2. Kommunit agguataarnerisa avataaniittuni ilagiit pillugit suliassat, ilagiit atuagaasa allattortarneri, nalunaarusiortarnerit il.il. pillugit suliassat ilanngullugit, domprovstimit suliarineqartassapput, taamaattorli tak. imm. 2. Qeqqani Tunumilu Provsteqarfimmi palasit arlaat ataaseq amerlanerusulluunniit suliassanik tamanik ilaannaannilluunniit isumaginnittussatut Domprovstip toqqarsinnaavai..

Imm. 2. Pituffimmut ilageeqarnikkut suliassat, atuagarsualerinerit, nalunaarusiortarnerit il.il. pillugit suliassat ilanngullugit Avannaani provstip isumagissavai. Avannaani provsteqarfimmi palasit arlaat ataaseq amerlanerusulluunniit suliassanik tamanik ilaannaannilluunniit isumaginnittussatut Avannaani Provstip toqqarsinnaavai.”

2.2 Siunnersuutip imarisaa

Atorfinitsitsisinnaaneq soraarsitsisinnaanerlu

Atorfinitsitsisinnaanermut soraarsitsisinnaanermullu piginnaatitaanerup biskoppimut tunniunneqarnissaanik siunnersuut imaqarpoq. Atorfinitsitsisinnaanermut soraarsitsisinnaanermullu piginnaatitsissutip nuunneqarneratigut suliaq allaffissornikkut ajornannginnerusumik sukkanerusumillu ingerlanneqartalissaaq. Peqatigitillugu atorfinitsitsisinnaanermut soraarsitsisinnaanermullu piginnaatitsissutip nuunneqarneratigut biskoppip ilagiinni sulisut tamaasa tamakkiisumik akisussaaffigilissavai.

Palaseqarfimmi atuagarsuarnut allattuisarneq

Palasi palaseqarfimmi atuagarsuarnut allattuisussatut akisussaasoq kisimiilluni taakkununga akisussaaffeqassasoq siunnersuutikkut erseqqissaassutigineqarpoq, taamaattorli suliap taassuma allamut, suliamik piginnaasaqartumut, tunniunneqarsinnaaneranut akornutissaqarnani. Suleriaatsimik allannguineq matumani pineqarpoq, assersuutigalugumi palaseqarfimmi palaseqanngitsumi suliassaq palasimit allamit suliarineqartarmat.

Siunnersuuteqarnikkut Ilageeqarnermut inatsimmi kapitel 6-imi ilinniartitaanerit atuuffii siammarneqarput aamma palasit, ajoqitut pattattutullu atorfeqartuunngitsut sulisut allat pikkorissarnernut ilaalersinnaallutik. Assersuutigalugu allaffissornermi suliallit, soorlu palasip

ikiortai, palaseqarfimmi atuagarsuarnik allattuisinnaanermut pikkorissartinneqarnissaannut tamatuma periarfississavai.

Oqaatsitigut naapertuutinngitsut

Ilageeqarnermut inatsisip kalaallisuaa danskisuuvalu imminnut arlalitsigut naapertuutinngitsut paasineqarsimavoq. Siunnersuutikkut taakku naqqissorneqassapput.

3. Pisortanut aningaasaqarnikkut allaffissornikkullu sunniutissat

Siunnersuut pisortat aningaasartuuteqarnerulernerannik kinguneqassanngitsut nalilerneqarpoq.

Allaffissornikkut pitsaasumik sunniuteqassasoq nalilerneqarpoq, palasinik, provstinik domprovstinillu atorfinitsitsinissamut piginnaatitsissut Naalakkersuisuniit biskoppimut nuunneqarmat. Biskoppi qinnuteqaatinik tigooqqaassaaq aallarniutaasumillu qinnuteqaatinik nalilersuissalluni, tamatumalu kingorna ilagiit sinniisaannik ataatsimeeqateqassalluni, palasitut atorfimmut qinnuteqartut pillugit oqaaseqaateqartussanik. Tamatuma kingorna biskoppip palasitut atorfinitsinneqartussatut inassuteqaatini Naalakkersuisunut nassiutissavai, kina palasitut atorfinitsinneqassanersoq pillugu aalajangiisussanut. Atorfinitsitsisinnaanermut soraarsitsisinnaanermullu piginnaatitsissutip Naalakkersuisuniit biskoppimut nuunneqarneratigut eqaannerusumik suliaqartoqartalissaaq.

Palasip oqaluffiup atuagarsuanut allattuisartup suliassaasa ilaannik palaseqarfimmi allaffissornikkut sulisumut allamut tunniuneqarsinnaaneratigut palasi oqaluffiup atuagarsuarnut allattuisartoq suliasaanik oqilisaaffigineqassaaq. Oqaluffiup atuagarsuarnut allattuisarnerup allaffissornikkut sulisooreersumut tunniuneqarsinnaavoq, taamaalilluni sulisussamik allamik atorfinitsitsinissaq pisariaqartinneqassanngilaq.

4. Inuussutissarsiutinik ingerlataqartunut aningaasatigut allaffissornikkullu sunniutissat

Siunnersuut aningaasaqarnikkut imaluunniit allaffissornikkut inuussutissarsiortunut sunniuteqassanngitaneqanngilaq.

5. Avatangiisinut, pinngortitamut inuillu peqqissuunissaannut sunniutissat

Siunnersuut avatangiisinut pinngortitamullu sunniuteqartussaannngitsutut nalilerneqarpoq.

6. Innuttaasunut kingunerisassat

Siunnersuut innuttaasunut kinguneqartussaannngitsutut nalilerneqarpoq.

7. Sunniutissat allat pingaarutilit

Namminersorlutik Oqartussanut nunanit tamalaanit pisussaaffinnik, pingaartumik inuit pisinnaatitaaffiinik aamma nunat inoqqaavisa pisinnaatitaaffiinik unioqqutitsisoqarnaviannngilaq. Siunnersuut allanik pingaarutilitsigut kinguneqassanngilaq.

8. Oqartussaasut suleqatigiiffiillu il.il. tusarniaavigineqarnerat

Siunnersuut piffissami 5. December 2025-imiit 5. januar 2026-imi tusarniaanernut isaaffikkut pissarsiarineqarsinnaasimavoq, tusarniaanermullu peqataasunut nassiunneqarsimalluni, takuuk ilanngussaq 2.

Aalajangersakkanut ataasiakkaanut oqaaseqaatit

§ 1-imut

Nr. 1-imut

Aalajangersagaq imm. 1-imut atasutut isigineqassaaq, tassani imatut allassimasoqarpoq:

”Palaseqarfimmi arlalinnik palaseqarsimappat palasit kiffartortut ilaat ataaseq taakku akornannit palaseqarfimmi atuagarsuarnik allattuisutut Biskoppip toqqassavaa, ukiut sisamat tikillugit atasussatut.” Tassa takuneqarsinnaasutut palaseqarfimmi arlalinnik palaseqartillugu palasimik atuagarsuarnik allattuisussamik biskoppi toqqaassaaq. Palaseqarfik ataasiinnarmik palaseqarpat, palasi taanna oqaluffiup atuagarsuanik allattuisartussatut toqqarneqassaaq.

Nr. 2-imut

Palasi palaseqarfimmi atuagarsuarnut allattuisussatut akisussaasoq kisimiilluni taakkununga akisussaaffeqassasoq siunnersuutikkut erseqqissaassutigineqarpoq, taamaattorli suliap taassuma allamut, suliamik piginnaasaqartumut, tunniunneqarsinnaaneranut akornutissaqarnani. Palaseqarfimmi sulisoq alla, palasit, ajoqitut pattattutullu atorfeqartuunngitsut sulisut allat ilinniagaqaqqittarnerannik naammassinnissimasoq, oqaluffiup atuagarsuanik isumaginninnissamut piginnaatinneqalersinnaanngussaaq.

Tamatuma nassataanik imm. 4 unn. 5-inngortinneqarpoq.

Nr. 3-imut

Biskoppip palasit, ajoqit pattattullu ilinniagaqaqqinnissaannik isumaginninnissamut pisussaaffii siammarlugit palasip ikiortaanut aamma atuutsinneqalerput. Taamaallilluni allaffissornikkut sulisut, soorlu palasit ikiortaat anersaakkut suliassanik isumaginninnissaanngitsut oqaluffiup atuagarsuinut allattuisinnaanermik pikkorissartinneqarsinnaalissapput.

Nr. 4-imut

Aalajangersakkami tunngavilerneqarpoq § 26 a, imm. 1, nr. 1-miit 3-mut Biskopi atorfinitsitsinissamut piumasaqaatini immikkut akuersisinnaasoq, kisiannili immikkut ittumik aatsaat pisoqarsimatillugu tunniunneqarsinnaalluni. Tamatumunnga pissutaavoq kikkulluunniit qanoq ilinniagaqarsimaneq apeqqutaatinnagu atorfimmuq qinnuteqarnissamik pisinnaatitaammata. Tassani Biskopip akuersissutigisussaavaa palasit atorfinitsitsineq.

Biskopip immikkut akuersissuteqarsinnaanermut aalajangersagaq atussappagu qinnuteqartoq atorfinitsitsinissamut piumasaqaatit § 26 a-miittut allat kiisalu sulilernissamut piumasaqaatit § 26 d-miittut naammassissallugit pisussaaffeqarpoq, ataani allassimasut takukkit.

Aalajangersagaq atorneqarsinnaassaaq, assersuutigalugu pineqartoq piginnaasanik palasit atorfimmik isumaginninnissami pingaaruteqarluartunik malunnartumik pigisaqarpat. Biskopi

atorfinittussamut tunngatillugu suliamut attuumassutilimmik nalilersorluarnissaanut periarfissaqassaaq.

Nr. 5-imut

Taamaallaat aalajangersakkamut kalaallisut oqaasertaliussaq allanngortinneqarpoq, oqaatsip ”ordineret” oqaatsitsigut naapertuutinngitsortaata iluarsineqarsimammat.

Kinaluunniit Kalaallit Nunaanni ilagiinni palasitut atorfinitsinneqartoq, atorfininnissamut piumasaqaatitut Biskopimit soraarummeersinneqarsimassaaq, tamatumunnga ritualit atuuttut naapertorlugit palasinngortinneqarsimassalluni, palasit neriorsuutaat atsiorsimassallugu kiisalu biskopimit kollatsi tigusimassallugu.

Biskopip suliassaraa atorfimmut pineqartumut qinnuteqartup/piukkunneqartup toqqagaasup piumasaqaatinik naammassinnissimanersoq misissussallugu.

Biskopip uppersaasigaanik palasitut sulisinnaanngortitaasimaneq, ivertitsineq palasitullu neriorsuineq ataasiaannartumik pissaaq, biskopimilli kollatsi atorfinitsitsinerit tamaasa piumasarineqartussaalluni. Kollatsi aqqutigalugu ilagiinni atorfik biskopip atorfini aqqutigalugu sulilersussamut tunniutissavaa. Kollatsi naalagiarluni ivertitsinermi atuarneqassaaq.

Nr. 6-imut

Qinnuteqartumit tunuartitsisoqartillugu ilagiillu sinniisaat oqaaseqaasiorertillugit, nutaatut oqaaseqaateqarnissamut ataatsimiittoqassaaq, tamatumani taasinerit tamarmik qinnuteqartunut agguanneqarnissaat qulakkeerniarlugu. Siullertut oqaaseqaasiorluni ataatsimiinnermi taaneqarsimatinnani qinnuteqartup qinnuteqaatini tunuarterpugu, nutaatut oqaaseqaasiornissamut ataatsimiittoqassanngilaq, taasinerimmi tamarmik qinnuteqartumut/qinnuteqartunut allanut agguanneqartussaammata.

Nr. 7-imut

§ 26f, imm. 4 atorunnaarsinneqarpoq, palasimik atorfinitsitsisinaanermut soraarsitsisinaanermullu piginnaatitsissutip Naalakkersuisunit biskoppimut nuunneqarnerata kinguneranik.

Nr. 8-imut

Aalajangersakkami biskopi palasimik inaarutaasumik atorfinitsitsissasoq aalajangiunneqarpoq. Atorfinitsitsisinaanermulli soraarsitsisinaanermullu piginnaatitsissutip Naalakkersuisunit biskopimut nuunneqarnera tunngavigalugu allannguisoqarpoq.

Nr. 9-imut

Imm. 1-mut.

Aalajangersakkami ilagiit sinniisaat oqaaseqaammik tunniussisimatinnagit biskopip qinnuteqartoq atorfinitsissinnaanngikkaa aalajangiunneqarpoq. Taamaalilluni oqartussaasunut biskopi aalajangeeqataasussaasutut pisussaaffeqarpoq, uani pisumi ilagiit sinniisaannut.

Imm. 2-mi takuneqarsinnaasutut, taasineri siullermi ilagiit sinnissaasa tamarmik qinnuteqartoq qinersimappassuk, pineqartoq atorfinitsinneqassaaq, qanorluunniit tulleriiaarisoqaraluarpat.

Imm. 2-mut

Aalajangersagaq atorneqarsinnaassanngilaq, assersuutigalugu, qinnuteqaatit ikippallaartut naammassinnissimasut tiguneqarsimatillugit. Pisuni amerlanerni taamaalisoqartillugu ilagiit sinniisaasa taasinerat aallartitsinnagu oqaaseqaammillu tunniussitinnagit, inuttassarsiuusseqqinnissaq isummerfigineqartussaassaaq. Kisiannili imaassinnaavoq taasisarnermi periuserineqartoq malillugu qinnuteqartunik amerlanernik pissarsiniarnissamut periarfissanik misissuititsisoqarnissaa pisariaqartoq. Inuttassarsiuineri qinnuteqartoq ataasiinnaasimappat ilagiillu sinniisaasa amerlanerit taaseqataannnginnerisigut ataatsimiinnermi taaneqanngitsoorpat, tamatumani aamma atorfiup inuttassarsiuunneqaaqqinnissaa kingorna eqqarsaatigineqarsinnaavoq.

Nr. 10-imut

Aalajangersakkami ilagiit sinniisai oqaaseqaammik suliaqareersimatillugit qinnuteqartup qinnuteqaatini tunuartippagu nutaatut oqaaseqaasiorniarluni ataatsimiittoqassasoq aalajangersarneqarpoq. Tamatumani qinnuteqartunut taasinerit agguataarneqarnissaat qulakkeerneqassaaq. Qinnuteqartoq qinnuteqaammik tunuartitsisoq ataatsimiinnermi siullermi taaneqarsimanngippat, oqaaseqaasiorniarluni ataatsimeeqqittoqassanngilaq. Tamatumunnga pissutaavoq, taasinerit tamarmik qinnuteqartumut agguataarneqarsimanissaat imaluunniit qinnuteqartut arlaqarsimappata, qinnuteqartunut agguataarneqarsimanissaat.

Nr. 11-imut

§ 26 k, imm. 4 atorunnaarsinneqarpoq, palasimik atorfinitsitsissinnaanermut soraarsitsissinnaanermullu piginnaatitsissutip Naalakkersuisunit biskoppimut nuunneqarnerata kinguneranik.

Nr. 12-imut

Palasinut atorfinitsitsissinnaanermut soraarsitsissinnaanermullu piginnaatitsissutip Naalakkersuisunit biskoppimut nuunneqarnera tunngavigalugu allannguisoqarpoq. Aalajangersakkami Biskopip aalajangissagaa provstitut imaluunniit domprovstitut atorfimmu kina atorfinitsinneqassanersoq aalajangersarneqarpoq.

Nr. 13-imut

Aalajangersagaq aalajangersakkamik atuuttumik ilaatigut ingerlatitseqqiineruvoq. Atorfinitsitsisinnaanermulli soraarsitsisinnaanermullu piginnaatitsissutip Naalakkersuisunit biskoppimut nuunneqarnera tunngavigalugu allannguisoqarpoq, tak. siunnersuummi § 26g. Taamaammat biskoppip nammineerluni nalilertussaavaa, Kalaallit Nunaanni Ilagiinni anersaakkut allaffissornikkullu atorfinnik pilersitsisoqarnissaanik atorunnaarsitsisoqarnissaanillu pisariaqartitsisoqarnersoq.

§ 2-imut

Inatsisartut inatsisaata allannguutaata 1. januar 2027-mi atuutilernissaa siunnersuutigineqarpoq. Taamaalilluni piareersarluareerluni allannguutit atuutsinneqarsinnaalissapput. Aamma allaffissornikkut najoqqutassani pisariaqartinneqartumik allannguisoqarsinnaalissaaq, inatsisip allannguutaanut peqatigitillugu atuutsilerneqarsinnaasunik.

Siunnersuut inatsimmut atuuttumut sanilliullugu	
<i>Oqaasertaliunneqartut atuuttut</i>	<i>Siunnersuutigineqartoq</i>
	§ 1 Ilageeqarneq pillugu Inatsisartut inatsisaat nr. 9 19. maj 2010-meersoq, allanngortinneqartoq Inatsisartut inatsisaanni nr. 2 29, november 2013-imeersumi aamma Inatsisartut inatsisaanni nr. 27 3. december 2018-meersumi allanngortinneqartumi, allannguutit makku ilanngunneqarput:
§ 15, imm. 2 <i>Imm. 2.</i> Palaseqarfimmi palasi ataasiinnaatillugu, taassuma atuagarsuarnut allattuineq isumagissavaa.	1. § 15, imm. 2, oqaasertalerneqassaaq imatut: "Imm. 2. Palaseqarfimmi palasi ataasiinnaatillugu, taassuma palasip atuagarsuarnut allattuineq isumagissavaa.
§ 15, imm. 4 <i>Imm. 4.</i> Atuagarsuarnik allattuisarneq pillugu Naalakkersuisut Biskopimut isumaqatigiinniareernikkut aalajangersakkanik aalajangersaasinnaapput."	2. § 15, imm. 4 nutaatut ikkunneqarpoq: " <i>Imm. 4.</i> Palasip atuagarsuarnik allattuisup palaseqarfimmi suleqataasumut atorfeqartumut allamut, palaseqarfiup atuagarsuit suliassartaannik suliarinnissinnaassusilimmut tunniussinnaavaa. Imm. 4 tamatuma kingorna imm. 5-inngussaaq.
§ 24. Biskoppip palasinik, ajoqinik pattattunillu ilinniartitseqqinnerit ingerlaqqillunilu ilinniartitsinerit isumagissarai. <i>Imm. 2.</i> Naalakkersuisut palasinik, ajoqinik pattattunillu ilinniartitseqqinnerit ingerlaqqillunilu ilinniartitsinerit pillugit aalajangersakkanik, biskoppi isumaqatiginiareerlugu aalajangersaasinnaapput.	3. § 24 ima oqaasertalerneqassaaq: " § 24. Biskoppip palasinik, ajoqinik pattattunillu aamma palasip ikiortaanik ilinniartitseqqinnerit ingerlaqqillunilu ilinniartitsinerit isumagissarai. <i>Imm. 2.</i> Naalakkersuisut palasinik, ajoqinik pattattunillu aamma palasip ikiortaanik ilinniartitseqqinnerit ingerlaqqillunilu ilinniartitsinerit pillugit aalajangersakkanik aalajangersaasinnaapput..
§ 26 b. Naalakkersuisut biskoppip	4. § 26 b ima oqaasertaqassaaq:

inassuteqareerneratigut inuk § 26a, imm. 1-imi piumasaqaatinik naammassinnissimanngitsoq palasit atorfimmi atorfinitsinneqarnissaannut immikkut ittumik akuerisinnaavaat.	” § 26 b. § 26 a, imm. 1-imi piumasaqaataasunik naammassinnissimanngitsoq palasit atorfinitsinneqarnissaa biskoppip immikkut ittumik akuersissutigisinnaavaa.
§ 26 d. Kinaluunniit Kalaallit Nunaanni ilagiinni palasit atorfinitsinneqartoq biskoppimit soraarummeersinneqarsimassaaq, ivertinneqarsimassaaq, ilagiinnut palasit neriorsuisimassaaq biskoppillu uppersaasigaanik palasit sulisinnaanngortitaasimassalluni.	5. § 26 d ima oqaasertaqassaaq: ” § 26 d. Kinaluunniit Kalaallit Nunaanni ilagiinni palasit atorfinitsinneqartoq biskoppimit soraarummeersinneqarsimassaaq, ivertinneqarsimassaaq, ilagiinnut palasit neriorsuisimassaaq biskoppillu uppersaasigaanik palasit sulisinnaanngortitaasimassalluni.”
Imm. 2. Ilagiinni sinniisut oqaaseqaateqareersut qinnuteqartup qinnuteqaanni tunuartippagu, biskoppillu inassuteqaat Naalakkersuisunut tunniutinnginnerani, imm. 4 naapertorlugu oqaaseqaatiliorniarluni ataatsimiittoqaaqissaaq. Qinnuteqartoq qinnuteqaamminik tunuartsisoq ataatsimiinnermi siullermi taaneqarsimanngippat, oqaaseqaasiorniarluni ataatsimeqqittoqassanngilaq.	6. § 26 f, imm. 2, ima oqaasertaqassaaq: ” Imm. 2. Ilagiit sinniisaasa oqaaseqaateqareernerisigut qinnuteqartup qinnuteqaatini tunuartippagu, nutaamik oqaaseqaasiorniarluni ataatsimiittoqassaaq. Qinnuteqartoq qinnuteqaamminik utertitsisoq siullermeerluni oqaaseqaasiorniarluni ataatsimiinnermi taaneqarsimanngippat, nutaamik oqaaseqaasiorniarluni ataatsimiittoqassanngilaq.”
Imm. 4. Biskoppi sapinngisamik qinnuteqartunik pingasunik pingaarnersiorlugit tulleriiaarneqartunik inassuteqassaaq. Biskoppip qinnuteqaatit ilagiit sinniisaasa oqaaseqaataannik ilallugit kiisalu nammineq inassuteqaanni ilanngullugu Naalakkersuisunut nassiutissavai.	7. § 26 f, imm. 4, atorunnaarpoq.
§ 26 g. Palasit atorfimmi kina atorfinitsinneqassanersoq Naalakkersuisut aalajangissavaat, tak. §§ 26e aamma 26f. Qinnuteqartoq biskoppip inassuteqaataanut ilanngunneqanngitsoq atorfinitsinneqarsinnaanngilaq biskoppi oqaaseqaateqarsimatinnagu.	8. § 16 a, imatut oqaasertalerneqarpoq: ” § 26 g. Biskoppip kina palasit atorfinitsinneqassanersoq aalajangissavaa, tak. §§ 26 e aamma 26 f.”
§ 26 h. Qinnuteqartoq ilagiit sinniisaasa oqaaseqaataanut	9. § 26 h, ima oqaasertaqassaaq: ” § 26 h. Qinnuteqartoq ilagiit sinniisaasa

ilanngunneqarsimanngitsoq Naalakkersuisut atorfinitsissinnaanngilaat. Qinnuteqartoq ilisimatitsiffiusumik ataatsimiinnermi siullermik taasisoqarnerani tamanit qinerneqartoq peqataanillu biskoppip inassuteqaataani ersertoq atorfimmi atorfinitsinneqassaaq. <i>Imm. 2.</i> Immikkut ittumik pissutissaqartoqarpat nutaamik inuttassarsiuisoqarnissaa nutaamillu inassuteqartoqarnissaa Naalakkersuisut aalajangersinnaavaat.	oqaaseqaataannut ilanngunneqarsimanngitsoq Biskoppip atorfinitsissinnaanngilaa. Qinnuteqartoq taasisitsinnermi siullermi taasisunit tamanit qinerneqarpat , taava taanna qinnuteqartoq atorfinitsinneqassaaq. <i>Imm. 2.</i> Immikkut ittumik pissutissaqartoqarpat nutaamik inuttassarsiuisoqarnissaa Biskoppip aalajangersinnaavaa.
§ 26 k, imm. 2 <i>Imm. 2.</i> Ilagiinni sinniisut oqaaseqaateqareersut qinnuteqartup qinnuteqaanni tunuartippagu, biskoppillu inassuteqaat Naalakkersuisunut tunniutinnginnerani, imm. 4 naapertorlugu oqaaseqaatiliorniarluni ataatsimiittoqaqqissaaq. Qinnuteqartoq qinnuteqaamminik tunuartitsisoq ataatsimiinnermi siullermi taaneqarsimanngippat, oqaaseqaasiorniarluni ataatsimeeqqittoqassanngilaq.	10. § 26 k, imm. 2, ima oqaasertaqassaaq: ” <i>Imm. 2.</i> Ilagiit sinniisaasa oqaaseqaateqareernerisigut qinnuteqartup qinnuteqaatini tunuartippagu, nutaamik oqaaseqaasiorniarluni ataatsimiittoqassaaq. Qinnuteqartoq qinnuteqaamminik utertitsisoq siullermeerluni oqaaseqaasiorluni ataatsimiinnermi taaneqarsimanngippat, nutaamik oqaaseqaasiorluni ataatsimeeqqittoqassanngilaq.”
§ 26 k, imm. 4 <i>Imm. 4.</i> Biskoppi sapinngisamik qinnuteqartunik pingasunik pingaarnersiorlugit tullerriaarneqartunik inassuteqassaaq. Biskoppip qinnuteqaatit ilagiit sinniisaasa oqaaseqaataannik ilallugit namminerlu inassuteqaanni ilanngullugu Naalakkersuisunut nassuitissavai.	11. § 26 k, imm. 4, atorunnaarpoq.
§ 26 l. Naalakkersuisut aalajangissavaat provstitut imaluunniit domprovstitut atorfimmut kina atorfinitsinneqassanersoq. Qinnuteqartoq biskoppip inassuteqaataanut ilanngunneqanngitsoq atorfinitsinneqarsinnaanngilaq biskoppi oqaaseqaateqarsimatinnagu.	12. § 26 l, imm. 1 ima oqaasertaqartinneqassaaq: ” § 26 l. Biskoppip aalajangissavaa provstitut imaluunniit domprovstitut atorfimmut kina atorfinitsinneqassanersoq.
§ § 26 m. Biskoppi Naalakkersuisut isumaqatiginiareerlugit Kalaallit Nunaanni Ilagiit ataanni anersaakkut sulisunut	13. § 26 m, imm. 1 ima oqaasertaqartinneqassaaq: ” § 26 m. Biskoppi Kalaallit Nunaanni

allaffeqarfinnilu sulisunut atorfiit pilersinnissaat atorunnaarsinnissaallu pillugit aalajangersakkanik aalajangiissaaq.	Ilagiit ataanni anersaakkut sulisunut allaffeqarfinnilu sulisunut atorfiit pilersinnissaat atorunnaarsinnissaallu pillugit aalajangiissaaq.”
	§ 2 Inatsisartut inatsisaat ulloq 1. januar 2027 atuutsilersinneqassaaq.

Ilanngussaq 2

Siunnersuut tusarniaavigisartakkanut 5. December 2025-imit 5. Januar 2026-mut ukununnga tusarniutigineqarpoq:

Biskoppen ilagiit@ilagiit.gl

Palaseqarfik Ittoqqortoormiit ittoqqortoormiut@ilagiit.gl

Palaseqarfik Ammassalik ammassalik@ilagiit.gl

Palaseqarfik Qaanaaq qaanaaq@ilagiit.gl

Palaseqarfik Upernavik upernavik@ilagiit.gl

Palaseqarfik Uummannaq uummannaq@ilagiit.gl

Palaseqarfik Qeqertarsuaq qeqertarsuaq@ilagiit.gl

Palaseqarfik Ilulissat ilulissat@ilagiit.gl

Palaseqarfik Qasigiannnguit qasigiannnguit@ilagiit.gl

Palaseqarfik Aasiaat aasiaat@ilagiit.gl

Palaseqarfik Kangaatsiaq kangaatsiaq@ilagiit.gl

Palaseqarfik Sisimiut sisimiut@ilagiit.gl

Palaseqarfik Maniitsoq maniitsoq@ilagiit.gl

Palaseqarfik Nuuk nuuk@ilagiit.gl

Palaseqarfik Paamiut paamiut@ilagiit.gl

Palaseqarfik Narsaq narsaq@ilagiit.gl

Palaseqarfik Qaqortoq qaqortoq@ilagiit.gl

Palaseqarfik Nanortalik nanortalik@ilagiit.gl

Avannaata Kommunia avannaata@avannaata.gl

Kommune Qeqertalik qeqertalik@qeqertalik.gl

Qeqqata Kommunia qeqqata@qeqqata.gl

Kommuneqarfik Sermersooq kommuneqarfik@sermersooq.gl

Kommune Kujalleq kommune@kujalleq.gl

Den Grønlandske Præsteforening (Nikoline Cortzen, nkce@ilagiit.gl)

Kirkeministeriet km@km.dk

Atorfillit Kattuffiat ak@ak.gl

IMAK imak@imak.gl

SIK sik@sik.gl

Suliffeqarfik X allappoq:

...

...

...

Naalakkersoq susassaqartup oqaaseqaatai:

...

...

...